

# INUIT ATAQATIGIIT

## INATSISARTUNI



Nuuk, 13.12.2011

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquaqateqarpunga:  
(Inatsisartuni ilaasorta q Naaja Nathanielsen, Inuit Ataqatigiit)

- 1) **September 2010-mi ingerlatseqatigiiffik Greenland Minerals and Energy Kuannersuarni nalinginnaasumik misissuinissaminut akuersissutaat ilassuserneqarpoq. Novemberimi 2011-mi Kuannersuarni misissuinissamut akuersissut ilassuserneqarpoq. Akuersissut september 2010-meersoq kiisalu november 2011-meersoq sutigut assigiingissuteqarpat?**
- 2) **Akuersissutit ilassuserneqarnerat imak paasineqassava Greenland Minerals and Energy akilersinnaassutsimik naatsorsuinerani uranimik tuniniaanermik isertitaasinnaasut ilanngunneqarsinnaalissasut?**
- 3) **Apeqqutit aappaannut akissut akuersaerneruppat: akilersinnaassutsimut naatsorsuinermi aamma ilanngussisoqassava uranimik tuniniaanertaqanngitsumik naatsorsuinermik?**
- 4) **Uranimik akoqarnerusumik qalluilersinnaanermut tunngatillugu Greenland Minerals and Energy VVM-mik misissuinissamik qinnuteqaataa tusarniutigineqarnikuua? Kikkunnullu tusarniaasoqarnikuua?**
- 5) **Apeqqutit sisamaannut akissut itigartitsineruppat: Sooq taamaattoqanngila? Qaqugu taamatut tusarniaasoqassava? Kikkunnullu tusarniaasoqassava?**

### **Tunngavilersuut**

2010 septemberiugaa Naalakkersuisut tusagassiuutitigut nalunaarutigaat Nunatsinni aatsitassanik misissuinermi nalinginnaasumik akuersissutit sinaakkutissaat ilassuserneqartut. Taamaaliornikkut pinngoqqaatit radioaktivusut nalinginnaasumik qinngornermik qaangiillutik qinngornillit aatsitassarsiornermi misissorneqarsinnaaneri nalunaarusiorneqartarnissaasalu sinaakkutissartai ersarissarneqarput. Uranimik aatsitassarsioqqusinngilluinnarnermik aalajangiisimanerup atuuttup Greenland Minerals and Energy A/S (GME)-ip misissueqqissinnaanera unitsimmagu Naalakkersuisut aalajangerput misissuinnaanermi sinaakkutissat ilaneqassasut. Ilutigitilluguli ilisimatitsissutigineqarpoq misissuinnaanermi sinaakkutit ilassuteqartinneqarnerat ima paasineqassanngitsoq GME-p allalluunniit VVM-imik suliaqarsinnaanermik imaalitsiaannaq aallartitsisinnaasut.

Ingerlatseqatigiiffinnut aatsitassanik qingornernik radioaktiv-iusunik annerusumik akulinnik qalluerusullutik VVM-imik qinnuteqartussanut tusagassiutitigut nalunaaruteqarnikkut erseqqissarneqarpoq, qinnuteqaat tamatumani susassaqtunut tamanut tusarniaatigineqartassasoq Namminersorlutik Oqartussanit akuersissummik tunniussisoqartinnagu.

Novemberip 30-ani 2011 Naalakkersuisut tusagassiutitigut nalunaarutigaat Greenland Minerals and Energy A/S (GME)-ip Kuannersuarni misissuinissamik akuersissutaannut ilassusiisimallutik. Tusagassiutitigut nalunaarut naapertorlugu tamanna isumaqarpoq ingerlatsivik aatsitassanik qingornernik ulorianartunik nalinginnaasumik qingornermik sakkortunerusumik qingorneqartunik ujarlersinnaangortoq. Misissuinissamut akuersissummik ilassutaasoq Naalakkersuisunit tunniunneqarpoq ingerlatsiviup akuersissutaasup - tassani aatsitassat radioaktiv-iusunut tunngasut ilaatillugit - sinaakktissartai ersarinnerusut kissaatigimmagit. Sinaakktissat ersarinnerusut qalluinissap imminut akilersinnaaneranut atatillugu misissuinerit inaarsarneqarnissaannut aammalu aatsitassarsiornerup avatangiisinut, inuit peqqissusaannut inuiaqatigiinnullu sunniutissartaasa nalilersuiffigineqarnissaannut ingerlatseqatigiiffimmit pisariaqartinneqarsimapput. Naalakkersuisut misissuinissamut akuersissummik ilassusiinerminni erseqqissarpaat Greenland Minerals and Energy aatsitassanik qingornernik ulorianartunik akulinnik qalluilernissaq ingerlatiinnartumik naatsorsuutigisinnaangikkaat.

Naalakkersuisut tusagassiutitigut nalunaarnerminni aamma oqaatigivaat GME qalluinissamik akuersissummik pissarsissagaluarpas ingerlatseqatigiiffiup ukiumut 43.000 tonsinik aatsitassanik qaqutigoortunik, taakkulu saniatigut aamma uran-oxidimik tuniassiorinissaq naatsorsuutigigaat.